

## NYUMBA YA HAKI YA ULIMWENGU

RIDVÁN – 2016

Kwa Wabahá'í wa Ulimwengu

Marafiki Wapendwa sana,

Kwa ujio ya Mfalme wa Sherehe, kipindi cha maandalizi kwa ajili ya Mpango ufuatao wa kiulimwengu kimekamilika: sasa tunawaita marafiki wa Mungu kwenye kujifunga kwa miaka mitano mipya ya ujasiri, unuiaji na rasilimali.

Kikosi cha waaminifu wa Baha'í'lláh kipo tayari. Mikusanyiko ya kiasasi iliyoitishwa kote ulimwenguni katika miezi ya hivi karibuni imetuma ishara za mfuatano za shauku ili kuanza shughuli hii kuu. Mambo muhimu yaliyomo katika ujumbe uliotumwa kwenye makongamano ya Washauri tayari yanatafsiriwa katika mipango mahsusi ya utekelezaji. Miongo ya jitihada ya kishujaa imeibumba jumuiya na kujipatia kipimo kilichothibitika cha uwezo katika kulea ukuaji, ikiimarisha kwa ajili ya wakati huu. Miongo miwili ya mwisho, hususan, imechapuza kwa udhahiri ustadi huu uliosubiriwa kwa hamu kwa ajili ya uinukaji.

Katika kipindi hiki, uasili wa mfumo unaokua kwa ajili ya utendaji umewawezesha marafiki kuendelea kulea na kuboresha uwezo muhimu, ukiibua matendo rahisi ya huduma mwanzoni, ukisababisha ruwaza ya utendaji yenye kueleweka zaidi, ambayo kwa upande mwingine ilidai ukuzaji wa uwezo ambao bado ni wenye utata zaidi. Kwa namna hii, mchakato wa kimpangilio wa ukuzaji rasilimali watu na ujenzi wa jumuiya umeanzishwa katika maelfu ya klasta—na, katika nyingi ya hizo, zinaendelea kusonga mbele zaidi. Umakinifu haukuwekwa tu juu ya muumini binafsi, au kwa jumuiya, au kwa asasi za Imani; washiriki wote watatu wasiotenganishika katika ukuaji wa hatua kwa hatua wa Utaratibu mpya wa Ulimwengu wanachochewa kwa nguvu za kiroho zinazoachiliwa kupitia ukunjukaji wa Mpango Mtakatifu. Dalili za ukuaji wao zinaonekana wazi zaidi na zaidi: katika ujasiri ambao waumini wasiohesabika wameupata kushiriki maelezo ya maisha ya Baha'u'lláh na kujadiliana athari za Ufunuo Wake na Agano lisilo na kifani; katika makundi yaongezekayo ya roho ambazo, matokeo yake, zimevutiwa kwenye Hoja Yake na zinachangia kwenye upatikanaji wa muono Wake uunganishao; katika uwezo wa Wabahá'í na marafiki zao, kwenye ngazi ya umma kabisa ya jumuiya, kuelezea kinaganaga tajiriba yao ya mchakato wenye uwezo wa kubadili tabia na kubumba uwepo wa kijamii; katika idadi kubwa zaidi ya maana ya wale wenyeji kwenye nchi ambao, kama wajumbe wa asasi na mawakala wa Kibahá'í, sasa wanaongoza shughuli za jumuiya zao; katika utegemezi, ukarimu, na kujitoa kwa dhabihu kwenye

Mfuko, muhimu sana kwa ajili ya kudumisha maendeleo ya Imani; katika uchanuaji ambao haujawahi kutokea wa jitihada za mtu binafsi na matendo ya pamoja katika kusaidia shughuli za ujenzi wa jumuiya; katika shauku ya roho nyingi sana zisizo na ubinafsi katika mwanzo wa ujana ambao wanaleta nguvu kubwa kwenye kazi hii, zinazoonekana kwa kujihusisha na elimu ya kiroho ya vizazi vichanga zaidi; katika kukuza hali ya kiibada ya jumuiya kupitia mikusanyiko ya mara kwa mara kwa ajili ya ibada; katika uinukaji wa uwezo kwenye ngazi zote za utawala wa Kibahá'í; katika utayari wa asasi, mawakala, na watu binafsi kufikiri kwa muktadha wa mchakato, kusoma uhalisia wao wa karibu na kutathmini rasilimali zao katika mazingira wanamoishi, na kupanga mipango kwa msingi huo; katika kile ambao sasa ni mchakato wa kawaida wa kujifunza, ushauriano, utendaji, na tafakari ambavyo vimekuza mkao wa silika ya ujifunzaji; katika utambuzi unaoongezeka kwa kile kinachomaanishwa kuleta matokeo kwenye Mafundisho kupitia shughuli za kijamii; katika fursa zinazojiongeza zinazofutwa na kuchukuliwa kutoa mtazamo wa Kibahá'í kwenye mijadala iliyoenea katika jamii; katika utambuzi wa jumuiya ya kiulimwengu kwamba, katika jitihada zake zote, inaharakisha utokezaji wa ustaarabu mtakatifu kwa kudhihirisha nguvu ya ujenzi wa jamii iliyomo ndani ya Hoja; kwa kweli, katika ufahamu wa marafiki kwamba juhudi zao za kukuza mabadiliko ya ndani, kupanua duara la umoja, kushirikiana na wengine katika uga wa huduma, kusaidia idadi za watu kuchukua wajibu wao katika ukuaji wao wa kiroho, kijamii, na kiuchumi—na, kupitia juhudi zote hizo, kuleta uboreshwaji wa ulimwengu—huelezea kusudi lenyewe hasa la dini.

Wakati hakuna kipimo kimoja kinachoweza kukamata ujumla wa maendeleo ya jumuiya ya Kibahá'í, mengi yaweza kuonwa kutokana na idadi ya klasta kote ulimwenguni ambako programu za ukuaji zimeanzishwa, ambazo, kwa shukrani kwa ajili ya neema zilizojaliwa na Uzuri wa Abhá, tunathibitisha zimevuka elfu tano. Msingi mpana sana kama huu ulikuwa wa muhimu kwa ajili ya kubeba jukumu ambalo sasa linaukabili ulimwengu wa Kibahá'í—kuimarisha mchakato wa ukuaji katika kila klasta ambamo ulianza na kupanua zaidi ruwaza itajirishayo ya maisha ya jumuiya. Juhudi endelevu inayohitajika itahitaji nguvu zaidi. Lakini matokeo yana uwezekano wa kuwa ya maana kubwa sana, hata kuweka kipindi cha kihistoria. Hatua ndogo ndogo, zikiwa za mara kwa mara na za haraka, huongeza kwenye umbali mkubwa uliosafiriwa. Kwa kumakinikia kwenye upigaji hatua ambao lazima ufanyike katika klasta katika kipindi cha mwanzoni—mathalani, katika duru sita zitakazotokea kabla ya kumbukumbu ya kwanza ya kumbukumbu za miaka mia mbili—marafiki watafanya mengi kuleta lengo lao la miaka yote mitano kuwa lenye kufikika. Katika kila duru zimewekwa fursa zinazopita kwa ajili ya kusonga mbele, uwezekano wa thamani kubwa ambao hautajirudia.

Katika jamii kwa ujumla, ole, dalili za kuzidi kunyong'onyea kwa roho daima zinazidishwa na kuwa mbaya zaidi. Ni jinsi gani inastaaajabisha kwamba, kadiri watu wa ulimwengu wanavyoteseka kwa uhitaji wa tiba ya kweli na kugeuka wazima wazima kutoka tumaini moja lisilo la kweli hadi lingine, kwa pamoja mnaboresha chombo

ambacho huunganisha mioyo na Neno la Mungu milele. Ni jinsi gani inastaajabisha kwamba, katikati ya sauti kali zinazohitilafiana za mawazo mgando na maslahi yanayopingana ambayo huchipuka kwa ukali zaidi kila mahali, mnamakinikia juu ya kuwaleta watu pamoja ili kujenga jumuiya ambazo ni kimbilio la umoja. Mbali na kuwakatisheni tamaa, acheni chuki za kiulimwengu na uhasama viwe ukumbusho wa jinsi gani kwa haraka roho ziwazungukazo huhitaji mafuta ya uponyaji ambayo nyinyi pekee mnaweza kuwapa.

Huu ni wa mwisho katika mfululizo wa mfuatano wa Mipango ya Miaka Mitano Mitano. Kwenye hitimisho lake, awamu mpya katika ukuaji wa hatua kwa hatua wa Mpango Mtakatifu itafunguka, ikiwa imejipanga kuisukuma jumuiya ya Baha'u'lláh kuelekea karne ya tatu ya Kipindi cha Kibahá'i. Acha marafiki wa Mungu katika kila nchi watambue ahadi ya miaka hii michache iliyo mbele, ambayo itakuwa maandalizi yenye nguvu kwa ajili ya kazi kubwa zaidi ambayo bado inakuja. Upeo mpana wa Mpango wa sasa unamwezesha kila mtu binafsi kusaidia kazi hii, hata mchango wa mtu uwe mdogo kiasi gani. Tunawaomba nyinyi, watendakazi-wenzi mthamaniwao, wahusudu wa Yule Ambaye ni Mpendwa Kabisa wa malimwengu, kutobakisha juhudi yoyote katika kutumia yote mliyojifunza na kila uwezo na ujuzi mlionao mliopewa na Mungu kuendeleza Mpango Mtakatifu kuelekea hatua yake muhimu ifuatayo. Kwenye maombi yenu ya shauku kwa ajili ya msaada wa mbinguni tunaongeza yetu, yanayotolewa kwenye Makaburi Matakatifu, kwa niaba ya wote wanaoshughulika kwa ajili ya Hoja hii ikumbatiayo wote.

*UMESAINIWA NA NYUMBA YA HAKI YA ULIMWENGU*